

Ils Rumantschs en la scena artistica

L'Uniun da Rumantschas e Rumantschs da la Bassa ha organisà in'emprima scuntrada a Basilea

■ **(anr/ac) La scena artistica da Basilea è dapi onns enritgida da pliras artistas e plirs artists da derivanza rumantscha. A la scuntrada organisada da l'Uniun da las Rumantschas e dals Rumantschs da la Bassa da l'emna passada a Basilea han intgins preschentà lur vita ed ovra.** La dumonda drizzada davart dal public al cineast *Hercli Bundi* ha pertutgà probablmain tut ils artists preschents a la scuntrada interrumscha da l'emna passada a Basilea. «Pon ins viver da quella lavur?» «Exister», ha Bundi respundì e preschentà sia novissima ovra ch'il cineast da lingua rumantscha ha mussà da curt per l'emprima giada a chaschun dal Festival da film a Leipzig. Suenter quatter onns lavur. In'ovra documentara davart l'artist austriac *Christian Eisenberger*. Eisenberger ha, en la vegliadetgna da 40 onns, già stgaffi datiers da 45 000 obras da different gener. Tranter auter installaziuns sin plazzas e vias ch'el ha surlaschè a lur destin. Cun sia enorma produziun è Eisenberger sa futrà da gallarias e museums e da la fiera d'art. Per il cineast Bundi è la situaziun e la dumonda davart la libertad artistica dad Eisenberger ina parabra per tut las artistas ed ils artists. Il motiv ch'el è sa decidì da suandar Eisenberger cun la camera. La dumonda che fatschenta il cineast creschì si a Cuir ha probablmain era plementà ils ulteriurs artists preschents l'emna passada en l'atelier da *Michel Pfister* a Münchenstein a l'ur da la citad da Basilea. Pfister ha frequentà sco *Urs Cavelti*, oriund da Sagogn, la Scola d'art a Basilea. Pfister, oriund da Vuorz ed activ sin il sumegliant champ artistic sco Cavelti. Plazzar sculpturas en il spazi public. Cavelti ha preschentà intginas da sias obras e sia filosofia da lavurar.

La via dal palpì en la gallaria

Michel Pfister da sia vart ha laschè suandar la via dad ina da sias sculpturas davent da l'emprima idea via la realisaziun e pre-

schentaziun. Sco per exempel a chaschun da la davosa exposiziun annuala en la chasa d'art a Cuir. *Ueli Pfister* è medemmain oriund da Vuorz e viva dapi bainprest 40 onns a Basilea. Ina scolaziun artistica ha era carmalà el a Basilea e la dumonda da l'existenza en vista ad ina atgna famiglia nun ha laschè memia blera libertad artistica. Il desegn a maun è dentant restà enfin oz il fundament da sia lavur grafica. Enconuschenta als lecturs da LQ durant plirs onns via ses comic dal «Cowboy». L'arranschament a Basilea è vegnì enromà musicalmain dal chantatur da Trun, *Mattiu Defuns*. Na, per casualità n'è la scuntrada interrumscha da Basilea betg s'entupada en l'atelier da Michel Pfister. Ses frar *Roman Pfister* presidiescha

dapi in onn e mez l'Uniun da las Rumantschas e dals Rumantschs da la Bassa e fa dapi curt temp part da la suprastanza da la Lia Rumantscha.

Vala la paina da cuntinuar

E Roman Pfister è medemmain stà preschent a Basilea l'emna passada ed ha explitgà da vulair cuntinuar cun las scuntradas rumantschas en diversas citads svizras. A Turitg succedian quellas regularmain essend che bleras Rumantschas e blers Rumantschs vivian en l'intschess da la citad. Il president da l'URB ha explitgà ch'il domicil dals Rumantschs da chasa en la Bassa na saja betg enconuschent. Uschia sajan las scuntradas da l'URB per part dependentas da la reclama verbala. La scuntrada

a Son Gagl haja, grazia a la participaziun dal Chor Grischn da Son Gagl, chattà buna accoglientscha. La scuntrada a Basilea avessia pudì vertir in pau dapli support. Ella saja dentant stada l'emprima scuntrada a Basilea ed i valia la paina da cuntinuar, è Roman Pfister persvadì. El tshertg vinavant duas persunas prontas da sa participar a la suprastanza da l'URB. Ina da quellas prontas da surpigliar la comunicaziun e la preschientscha da l'uniun en la rait. Cuntinuar cun las scuntradas interrumschas a Basilea vul era Michel Pfister. Ina ulteriura giada, sco el ha tradì l'emna passada en ses atelier, cun dapli preschentaziun da la vart feminina rumantscha da chasa en il ravugl da la citad da Basilea.



Han preschentà lur vita e lur ovra a l'emprima scuntrada interrumscha a Basilea: Urs Cavelti, Michel Pfister ed Ueli Pfister (da san.) e davant Hercli Bundi.